

E MONOLUGH DAL TATAR

(Verso dentro) Tèm e' pòst, am aracmand, tèm e' pòst! A vègn sòbit! A vègh a què d'drì de' tèatar a impinì la bocia! Tèm e' pòst, a vègn sòbit!

Osta ad cheld e ac stricadùr che u j è in gapunèra, un gnè gnèca e' pòst da tni la bòcia che e' bsògna mettla stra al gamb, con serio pericolo per il contenuto.

Parchè as pòll andè a e' teatar senza la bocia? Se c'è da piangere ti attacchi e ti consoli, se c'è da ridere, ridi meglio e con più gusto.

Parchè mè a e' tèatar a j andrèbb totti quanti al sèr; opere, commedie, tragedie, a gli ho vesti tòti.

Anzi una volta a sera neca in ti cùresta e a fasimi la stasòn in Grecia, a Patrasso, in dò che la sera d'la prèma a e' soprano u i avnè una toss che la parèva una cavala bolsa.

E' direttor e rugièva: "Siamo rovinati, come facciamo?"

Gnit paura, ci sono io! Am amanì da dòna, am mitì una bèla paròca e a vègh in scena mè!

Ma non si può, e fa e' direttòr!

Ma sé che us po' fè, a fègh mè!

Ma si, ma no... all'ora de' spettacùl im mitè una bèla palandrana, una paròca bionda cùn al trezz che al m'ariveva a e' bigual e andè in scena mè.

Oh, coma che a sera bèll!

Cùn di gurghegg che i faceva avnì la pèll d'oca.

La zènt l'as divartè tant, u j fò sòl un vigliac d'un giurnalèsta che e' dè dòp e' scrivè in te' fòj che così dei versi non li aveva mai sentiti, sembravano quelli di un suino agonizzante.

RISATA

I giurnalèsta i scriv sèmpar mèl ad nùietar attùr, e pinsè che i và a e' teatar e in spènd un franch.

BEVE

E' vèn! L'è la ròba piò bona che u j sèja sòra la faza d'la tèra. Chiletto, e fiòl de mi patròn, um cùnteva che in Rossia, in Prossia, a so bèh mè in dòv, e' vèn in sa gnèca che u j sèja, i bèv la bèra!

PACH!!

An ho sintù una volta um s'arvultè tòttquant i paramènt, un parèva d'avè mandè zò de pèss d'caval.

E' vèn e' nutrèss in t'una manira da non credar.

Se a m'avessùv vèst quand che a sèra znèn, fasi cònt d'avdè un bigùal, pròpi un argnèqual bòn da gnit, e se ha j ho fatt d'la chèrna l'è stè e' vèn, e d'chè bòn! Una brasùla in t'la gardèla e un bichir ad vèn ròss, l'è trent'ènn che a fègh claziòn acsè!

BEVE

Guardi i prit, guardate i preti che ci hanno dell'ingegno, i dis la messa a la matèna prèst, ma se in ha un bichir ad vèn scièt, in la dis brisa!

Don Galena, e' parùch ad Sassadì, una vòlta e' piantè a mezz la Messa parchè e' vèn l'avèva da fòrt.

E don Galèna un s'in dbèva miga di bichir, un s'in dbèva di litar...

Una vòlta ul ciamè l'Arzivèscùv e u j dasè una bèla raviulèda, mo av cardiv che don Galena e' dgèss che un era brisa a vera...!

Gnèca par e capar! E Dgè: "Eminenza, quand che a pens che quello che bevo è sangue del Nostro Signore, mè a m'in birèbb una castlè!"

BEVE

Putè essar coma c'la Principessa che la staseva a Parigi, i m'ha vlù dì cl'è vèra...

Tòti al matèn la faceva sgiudurè 100 bòci ad "Buldo", che l'è una specie de' nòstar sanzvèss, mò soprafino, e pù l'al miteva in t'la bagnaròla e pù dèntar a fèj e' bagn. I dis che l'è una cura par rinfunzè i nirùv...

Dop la camarira invèzi d'bùtèl vèja l'al turnèva a imbuciè e l'al vindèva a un òst. A j ho dètt che a gli era 100 al bòci, quand che la camarira l'al cavèva a gli era 101! Còma a srala? Indovinala grillo?

Se a faceva e' bagn mè in te' bulgo un armasteva poch,!

A j ho què una bònna barilòta!

A tachèva a ciuciè e infèna che un'gnèra una gòza a titèva sèmpar.

Quand che a seva zòvan, l'era ancora piò granda; tant che mi mujèr, la pureta, l'am dgè: "Mò Archimede vat a fèt d'avdè da un dùtòr...!" e mè a j andè, nèca parchè l'era un po' d'tèmp che an staseva bèn, am sinteva un sgùmbej, un sbrùmblazèr in t'la panza.

E' d'ùtòr um smanè, un tastè, un scusè tòt quant e pù um dgè:
"Archimede bisogna stare in riguardo perché a qui ci hai l'idropisia"

Dropisia, a fègh mè, mo ac straza malatèja èla nèc quèsta?
E lò um arspundè: "E' acqua che ci hai nella panza!"

RISATA

Ai fasè una gran risèda in t'la faza e pù a j dgè: "D'ùtòr lò l'è un gran
sumar, l'ha stugiè par gnit! Parchè aj pòss zurè che da pù che a so a e'
mònd, dl'acqua in t'la mi panza in n'in è andè gnèca una gòza!!!"

BEVE

(Gurada e scuote la bottiglia) L'è bòn, mò e cala!

L'è l'ònich difètt che l'ha stè vèn, l'è bòn mo e' cala.....